

大佛頂如來密因脩證了義諸菩薩萬行首
楞嚴經會解卷第十一

遯一

天竺沙門般刺密帝譯

烏菴國沙門彌伽釋迦譯語

菩薩戒弟子前正議大夫同中書門下平

遯一

章事房融筆受

師子林沙門 惟則 會解

爾時觀世音菩薩即從座起頂禮佛足而白
佛言世尊憶念我昔無數恒河沙劫於時有
佛出現於世名觀世音我於彼佛發菩提心

彼佛教我從聞思修入三摩地

溫陵曰觀音者觀世言音圓悟圓應之號
也於音言觀者以觀智照之不以耳識聞
之也所師之佛亦名觀音者因果相符古
今一道也達耳之謂聞著心之謂思治習

之謂修三者圓明是名三慧孤山曰此與
法華有殊彼云一心稱名菩薩即時觀其
音聲皆得解脫則音在他機也此云由我
觀聽十方圓明故觀音名徧十方界則音
徧自行也應知因中自行果上化他二義
必備兩經所說各舉一邊耳吳興曰準下
文云由我不自觀音以觀觀者令彼十方
苦惱衆生觀其音聲即得解脫此亦同於
法華釋名之意也但彼爲流通本經故偏
對他機今爲伸叙昔證故正約自行教即
世音聞即耳根皆所觀之境也思脩皆能
觀之觀也然則觀由境入境實徧通而特
取音聞者乃逗機之要也
初於聞中入流亡所所入既寂動靜二相了
然不生如是漸增聞所聞盡盡聞不住覺所

覺空空覺極圓空所空滅生滅既滅寂滅現前

吳興曰舊約三慧次第銷之今則不爾節文爲四一亡前塵即初於聞中至了然不生也八流亡所者流謂法性所謂音塵入

選一

二

之與亡通乎觀行相似之位也所入法性體既常寂是則前塵本自不動今亦無靜故云二相了然不生也二盡內根即如是漸增聞所聞盡也前塵易亡內根難盡以由亡智有疎有親故云漸增也聞所聞盡謂能聞所聞之根亦復不生也此乃舉所顯能也下覺所覺空及空所空滅例亦如之三空觀智即盡聞不住覺所覺空也上句遣前盡相下句正空觀智覺謂覺照即智體也四滅諦理即空覺極圓空所空滅

也上句顯重空之智下正滅重空之理問理本寂滅復何滅乎答若謂寂滅此滅猶生但破其情非破其理如智論云不破聖人心中所得涅槃爲未得者執成戲論是故須破已上四節若約三慧言之從初入

流義必具足不可亡所未有思脩苟執次第恐傷文理生滅等結前理智根塵生滅既滅即得初住分證寂滅現前

忽然超越世出世間十方圓明獲二殊勝一者上合十方諸佛本妙覺心與佛如來同一

選二

三

慈力二者下合十方一切六道衆生與諸衆生同一悲仰

吳興曰上云慈力者慈既與樂必能拔苦應以力字兼於悲義也下云悲仰者悲謂悲苦仰謂仰樂此非屬應蓋言其機也是

故厭患苦道則以悲爲機欣慕樂果則以
仰爲感菩薩所證圓通之理偏在衆生悲
仰之中故曰與也同也當知衆生由悲故
能感拔苦之力菩薩由慈故能應仰樂之
機感應常冥與拔常顯若曉斯旨則下文

三十二應乃至四不思議無忘其本乎

世尊由我供養觀音如來蒙彼如來授我如
幻聞熏聞脩金剛三昧與佛如來同慈力故
令我身成三十二應入諸國土

橋李曰幻喻三慧體不可得金剛喻摧堅

之能也溫陵曰三十二應者現十法界身

圓應羣機也開之有三十二合惟四聖六

凡攝盡群類

世尊若諸菩薩入三摩地進脩無漏勝解現
圓我現佛身而爲說法令其解脫

孤山曰菩薩別圓機也若入相似三摩地
進脩中道無漏則分真勝解現圓乃至若
進脩金剛無漏則究竟勝解現圓大士皆
現佛身爲說頓法令得分真究竟解脫問
菩薩何能現佛身邪答心性理顯高下無

殊如鏡已明形對像現臣家之鏡王苟臨
之豈無王像王家之鏡臣苟對之豈無臣
像當知人有高下鏡無貴賤然亦不妨明
有優劣問等覺菩薩豈假初住現佛說法
邪答聞法得解何必求人復假勝身彌增

總一

四

內慧且天魔現爲佛像邈多尚乃致禮況
初住菩薩妙理所現等覺雖尊孰敢不仰
況觀音本是古佛豈不能爾補註曰觀音
古佛且置勿論只據今經既謂超越世出
世間又言上合諸佛同一慈力就超越合

同四字求之其證非淺然則現佛說法理固宜然又豈容以初住分真爲局爲難哉若諸有學寂靜妙明勝妙現圓我於彼前現獨覺身而爲說法令其解脫若諸有學斷十二緣緣斷勝性勝妙現圓我於彼前現緣覺身而爲說法令其解脫

溫陵曰獨覺者出無佛世觀物變易自覺無生故號獨覺樂獨善寂求自然慧故曰寂靜妙明緣覺者稟佛之教觀緣悟道也知迷勝性由十二緣於是斷之自無明滅至憂悲苦惱滅則緣斷而勝性現矣性因緣斷而現故曰緣斷勝性橋李曰勝妙現圓者各約自乘理智將欲現前得此名也若諸有學得四諦空脩道入滅勝性現圓我於彼前現聲聞身而爲說法令其解脫

迦二

五

橋李曰三果已前賢位聖位俱屬有學見道一十六心斷四諦下惑證生空理故曰得四諦空初果後進斷三界八十一品俱生品皆證一分擇滅無爲故云脩道入滅孤山曰二乘藏通機也雖有菩薩而藏

同人天不斷惑故通同二乘所證齊故

若諸衆生欲心明悟不犯欲塵欲身清淨我於彼前現梵王身而爲說法令其解脫若諸衆生欲爲天主統領諸天我於彼前現帝釋身而爲說法令其成就若諸衆生欲身自在遊行十方我於彼前現自在天身而爲說法令其成就若諸衆生欲身自在飛行虛空我於彼前現大自在天身而爲說法令其成就孤山曰梵王即色天主名爲屍棄此云頂髻瓔珞明四禪皆有王今言梵者應是初

禪之頂以有覺觀語言之法得爲千界之主說法者如金光明云大梵天王說出欲論解脫者令離欲塵也帝釋即欲界第二天主彼天橫有三十三天而帝釋統之說法謂十善也金光明云釋提桓因種種善

論是也自在天是欲界頂天具云婆舍跋提此云他化自在假他所作以成已樂即魔王也或云第六天上別有魔王居處亦自在天攝大自在即色頂摩醯首羅天大論云三目八臂騎白牛執白拂者是也溫

陵曰初舉梵王復自欲天超至色頂意兼無色以明無刹不現也

若諸衆生愛統鬼神救護國土我於彼前現天大將軍身而爲說法令其成就若諸衆生愛統世界保護衆生我於彼前現四天王身

迦一

六

而爲說法令其成就若諸衆生愛生天宮驅使鬼神我於彼前現四天王國太子身而爲說法令其成就

溫陵曰上舉正統此舉臣輔也天將軍爲帝釋上將統領鬼神四天王臣於帝釋統

領世界四天太子即那叱之類能驅鬼神若諸衆生樂爲人王我於彼前現人王身而爲說法令其成就若諸衆生愛主族姓世間推讓我於彼前現長者身而爲說法令其成就若諸衆生愛談名言清淨自居我於彼前現居士身而爲說法令其成就若諸衆生愛治國土割斷邦邑我於彼前現宰官身而爲說法令其成就若諸衆生愛諸數術攝衛自居我於彼前現婆羅門身而爲說法令其成就

溫陵曰自金輪至粟散皆人王也粟散即
邦國小王散於天下如粟之多長者具十
德謂姓貴位高大富威猛智深年耆行淨
禮備上歎下歸故爲族姓之主世間推讓
也隱居求志行義達道名居士愛談名言

迦一

七

即典雅之言也三台輔相州牧縣長悉號
宰官婆羅門此云淨行四姓之一也愛諸
數術即和合占相推步盈虛也

若有男子好學出家持諸戒律我於彼前現
比丘身而爲說法令其成就若有女人好學

出家持諸禁戒我於彼前現比丘尼身而爲
說法令其成就若有男子樂持五戒我於彼
前現優婆塞身而爲說法令其成就若有女
子五戒自居我於彼前現優婆夷身而爲說
法令其成就

孤山曰優婆塞云近事男優婆夷云近事
女以五戒自守堪任近事出家二衆故
若有女人內政立身以脩家國我於彼前現
女主身及國夫人命婦大家而爲說法令其
成就若有衆生不壞男根我於彼前現童男
身而爲說法令其成就若有處女愛樂處身
不求侵暴我於彼前現童女身而爲說法令
其成就

孤山曰女主即天子之后也周禮天子之
后立六宮三夫人九嬪二十七世婦八十

一御妻國夫人如論語邦君之妻曰君夫
人命婦謂妻因夫榮者也大家如後漢扶
風曹世叔妻者同郡班彪之女名昭字惠
姬和帝數召入宮令皇后貴人師事焉號
曰大家

若有諸天樂出天倫我現天身而爲說法令其成就若有諸龍樂出龍倫我現龍身而爲說法令其成就若有藥叉樂度本倫我於彼前現藥叉身而爲說法令其成就若乾闥婆樂脫其倫我於彼前現乾闥婆身而爲說法

迦一

八

令其成就若阿脩羅樂脫其倫我於彼前現阿脩羅身而爲說法令其成就若緊那羅樂脫其倫我於彼前現緊那羅身而爲說法令其成就若摩呼羅伽樂脫其倫我於彼前現摩呼羅伽身而爲說法令其成就若諸衆生

樂人脩人我現人身而爲說法令其成就若諸非人有形無形有想無想樂度其倫我於彼前皆現其身而爲說法令其成就

孤山曰藥叉此云輕捷乾闥婆此云香陰新翻尋香行帝釋樂神也阿脩羅云無端

正以女美而男醜故從男彰名新翻非天以誚詐無天行故準普門品八部此闕迦樓羅即金翅鳥也緊那羅形似人而頭有角因呼爲疑神天帝絲竹樂神也小劣乾闥婆新云歌神摩呼羅伽什師云地龍摩

父云大蟒腹行也長水曰有形如休咎精明等無形如空散銷沉等有想如神鬼精靈等無想如精神化爲土木金石等皆非人也

是名妙淨三十二應入國土身皆以三昧聞

迦一

九

熏聞脩無作妙力自在成就

溫陵曰迹示同類心絕愛見名妙淨依無作智起大神用名妙力無作無爲隨緣沉應名自在成就吳興曰三十二應比普門品雖互有出沒大體是同揔而言之無越

十界於十界中兩經俱無菩薩并地獄身者或曰聖言之略耳或云觀音已是菩薩何須更現地獄苦重不可度也智者依正法華具現菩薩界身又準釋論菩薩亦化地獄故知十界不可闕焉

世尊我復以此聞熏聞脩金剛三昧無作妙力與諸十方三世六道一切衆生同悲仰故令諸衆生於我身心獲十四種無畏功德溫陵曰由我不自觀音而彼獲脫苦由我知見旋復而彼能不燒故曰於我身心獲

無畏德

一者由我不自觀音以觀觀者令彼十方苦惱衆生觀其音聲即得解脫

溫陵曰不自觀音者不隨聲塵所起知見也以觀觀者謂旋倒聞機反照自性也不

起知見則無所妄反照自性則一切真寂無復苦惱可得此則真觀淨觀大智慧觀能破癡暗能伏災難故令苦衆生蒙我真觀即得解脫吳興曰聖人無已惟物是利故以觀音之智加彼觀聲之機於苦得脫

不旋踵矣若夫止稱名號罔識聞熏善應未臻而責聖言之虛者是猶洒一杯之水救積薪之火火不熄則謂水不勝火惑亦甚哉補註曰環師之解觀聲在應岳師之解觀聲在機二說不可偏廢故互存之當

遊一

十

知下文意不殊此

者知見旋復令諸衆生設入大火火不能燒三者觀聽旋復令諸衆生大水所漂水不能溺

溫陵曰內外四大常相交感見覺屬火聞

聽屬水故見業交則見猛火聞業交則見波濤今知見旋復則無見業觀聽旋復則無聞業故水火不能燒溺也於聽言觀猶音言觀也大水所漂意兼風灾構李曰準大台釋火難有三種一果報火下從地獄

上至初禪二惡業火通三界三煩惱火通三乘火難既爾他皆放此

四者斷滅妄想心無殺害令諸衆生入諸鬼國鬼不能害五者熏聞成聞六根銷復同於聲聽能令衆生臨當被害刀段段壞使其兵戈猶如割水亦如吹光性無搖動

孤山曰熏於妄聞成真聞性溫陵曰一根既圓則六根銷復同於聲聽無復形礙故如割水吹光也

六者聞熏精明明徧法界則諸幽暗性不能

通二

上

全能令衆生藥義羅刹鳩槃荼鬼及毘舍遮富單那等雖近其傍目不能視七者音性圓銷觀聽返入離諸塵妄能令衆生禁繫枷鎖所不能着八者滅音圓聞徧生慈力能令衆生經過險路賊不能劫

孤山曰藥義如前肇師云有三種一在地二在虛空三在天羅刹云可畏鳩槃荼厭魅鬼毘舍遮散精氣鬼富單那熱病鬼溫陵曰聞熏精明燦彼幽暗故不能視也音性圓銷則內無所繫觀聽返入則外無所

累故枷鎖自脫也音聞兩立則物我成敵今滅音圓聞則內外無待故能徧生慈力無復怨敵矣

九者熏聞離塵色所不劫能令一切多婬衆生遠離貪欲十者純音無塵根境圓融無對

所對能令一切忿恨衆生離諸瞋恚十一者
銷塵旋明法界身心猶如琉璃朗徹無礙能
令一切昏鈍性障諸阿顛迦永離癡暗

溫陵曰衆生以欲習合塵故爲色劫能以
金剛三昧熏聞成性遂能離塵成性則欲

愛乾枯離塵則根境不偶故雖有妖色不
能劫動矣瞋由違情而起對境而生音性
純淨無復妄塵故圓融無違無能所對無
違無對則不瞋矣癡由妄塵所蔽無明所
覆銷塵則無蔽旋明則無覆故外之法界

內之身心凝瑩朗徹離癡暗矣性障即癡
也阿顛迦此云無善心內業有十而壞滅
法身惟婬怒癡爲甚故舉三以兼餘具興
日準天台釋三毒通界內外內謂思惑外
謂無明二乘以欣涅槃爲貪厭生死爲瞋

遊二

士

迷中道即癡菩薩廣求佛法訶惡二乘未
了佛性皆是三毒

十二者融形復聞不動道場涉入世間不壞
世界能徧十方供養微塵諸佛如來各各佛
邊爲法王子能令法界無子衆生欲求男者

誕生福德智慧之男十三者六根圓通明照
無二含十方界立大圓鏡空如來藏承順十
方微塵如來秘密法門受領無失能令法界
無子衆生欲求女者誕生端正福德柔順衆
人愛敬有相之女

溫陵曰融形則礙滅復聞則性真故涉入
世間而無動無壞能徧十方供微塵佛稟
承其法各爲法子供佛足福稟法足慧而
能紹繼法王有男子之道故能應其求也
六根圓通下謂圓故無二通故含界明照

則大圓鏡智之質也。含界則空。如來藏之體也。具此故能承順法門。受領無失。承順即坤儀柔德。受領即閨門能事。有女之道。故能應其求也。吳興曰。智者引阿含明地獄已上。乃至欲天。皆有無子之苦。令所求

選一

三

者悉能滿心。是亦拔其苦也。構李曰。涉入世間不壞世界。即方便智。方便屬權。權能幹事故。生於男也。立大圓鏡空。如來藏。即屬實智。實智諸理。理能含育。故生於女也。如淨名云。智度菩薩母。方便以爲父。即其

義焉。

十四者。此三千大千世界百億日月現住。世間諸法。王子有六十二億。恒河沙數。脩法垂範。教化衆生。隨順衆生。方便智慧。各各不同。由我所得圓通。本根發妙耳門。然後身心微

妙。含容周徧。法界能令衆生持我名號。與彼共持。六十二億。恒河沙諸法。王子二人。福德正等。無異世尊。我一號名。與彼衆多名號。無異。由我脩習得真圓通。是名十四施無畏力。福備衆生。

孤山曰。法華亦有此之較量。及觀今經。方曉彼意。蓋此方衆生耳根利。故受道者多。所以觀音化勝餘根鈍。故受道者少。所以諸聖化劣。是知行位。雖齊對機。有異總彼。恒河沙數。但敵觀音一人。故使持名二福。正等。據此所說。已自密簡耳根圓通爲未曉者。更俟文殊詳擇百億日月者。百億刹土。也是名下總結也。世尊我又獲是圓通。脩證無上道。故又能善獲四不思議。無作妙德。

溫陵曰現衆多容誦一一呪攝化衆生圓應所求理出於無爲神應於不測名不思議無作妙德然前亦現形應求獨此名不思議者前則略顯此復深明如於一身現八萬首臂固莫得而思議也

迦一

十四

一者由我初獲妙妙聞心心精遺聞見聞覺知不能分隔成一圓融清淨寶覺故我能現衆多妙容能說無邊祕密神呪其中或現一首三首五首七首九首十一首如是乃至一百八首千首萬首八萬四千燦迦羅首二臂四臂六臂八臂十臂十二臂十四十六十八二十至二十四如是乃至一百八臂千臂萬臂八萬四千母陀羅臂二目三目四目九目如是乃至一百八目千目萬目八萬四千清淨寶目或慈或威或定或慧救護衆生得大

自在

溫陵曰言初獲者指本因也首爲六用之捻臂表提接之悲目表照了之智各依本數充之以至八萬四千者表依根本六用根本智悲而汎應塵勞得大自在此十一

地等覺妙行也華嚴十地已前猶依本智長養大悲至十一地長養功終純是大悲爲法界體與智圓現故觀音手眼通身偏身而以大悲稱也一體之中塵勞萬法慈威定慧無所不備而繼二十四聖示現者

迦二

五

明彼所現雖各一端圓而會之咸極于此使悟入者不止二十五門頓了八萬塵勞法界事理曾不離吾一圓融淨覺之體能同能異即一即多無邊刹海德用徧周十方身土境相相入邪正吉凶之術養生安

物之方法法圓通塵塵具足矣或曰八萬四千特表法耳一身何所施乎是特以有思惟心測度菩薩圓通境界也夫身含十虛毛端現刹彼空與刹又不啻如首臂而已彼八萬四千首臂猶人之八萬四千毛

孔耳未足異也聖人之言即事即理既曰不思議德無以限意思之議之樂迦羅云金剛堅固不壞也母陀羅云印各有妙印也清淨寶目離塵合覺也慈以攝化威以折伏定以復湛慧以開覺通指衆多妙容也

二者由我聞思脫出六塵如聲度垣不能爲礙故我妙能現一一形誦一一咒其形其咒能以無畏施諸衆生是故十方微塵國土皆名我爲施無畏者三者由我脩習本妙圓通

清淨本根所遊世界皆令衆生捨身珍寶求我哀愍

溫陵曰本根清淨則一切無着故能令衆生捨諸慳着也求我哀愍者哀愍受之而爲施作佛事也

四者我得佛心證於究竟能以珍寶種種供養十方如來傍及法界六道衆生求妻得妻求子得子求三昧得三昧求長壽得長壽如是乃至求大涅槃得大涅槃

溫陵曰得佛心證慧足也珍寶供養福足

總一

共

也福慧兩足故傍及衆生使彼所求如願也吳興曰此四不思議前二屬應後二對機應中備顯形聲二益初文雖云說咒而正示形益即應身功用也次文雖復現行而正示聲益即名稱普聞也機中具明因

果二相先明脩因則六度之中略舉布施
俾求福故後明感果則世出世願靡不成
就令得樂故

佛問圓通我從耳門圓照三昧緣心自在因
入流相得三摩地成就菩提斯爲第一世尊
彼佛如來歎我善得圓通法門於大會中授
記我爲觀世音號由我觀聽十方圓明故觀
音名徧十方界

溫陵曰初於聞中入流亡所是從耳門得
圓照也由得圓照故隨緣應化得大自在

吳興曰按觀音三昧經及大悲經並云此
菩薩過去久已成佛號正法明又悲華經
說往昔寶藏如來授不瞬太子記名觀世
音然則悲華與今經皆覆本垂跡之名耳
今得圓通即太子後身也

遊一

十七

大佛頂如來密因脩證了義諸菩薩萬行首
楞嚴經會解卷第十一

音釋

龜巨六切彪悲幽切家音姑女踵之勇切
侯待也垣禹煩切瞬目動也